

南無本師釋迦牟尼佛



## 妙法蓮華經卷第六

### 囑累品第二十四

爾時釋迦牟尼佛從塔座起。現大神力。以右手摩無量菩薩摩訶薩頂。而作是言。我於無量百千萬億阿僧祇劫。修習是阿耨多羅三藐三菩提難得之法。今以付囑汝等。汝等應當一心流布此法。廣令增益。如是三摩諸菩薩摩訶薩頂。而作是言。我於無量百千萬億阿僧祇劫。修習是阿耨多羅三藐三菩提難得之法。今以付囑汝等。汝等當受持讀誦。廣宣此法。令一切菩薩普得聞知。所以者何。如來有大慈悲。無諸慳吝。亦無所畏。能與菩薩佛之智慧。如來是一切菩薩之大導師。汝等亦應隨學如來之法。勿生慳吝。於未來世。若有善男子善女人。信如來智慧者。當為演說此法華經。使得聞知。為令其人。得佛慧故。若有衆生。不信受者。當於如來餘深法中。示教利喜。汝等若能如是。則為已報諸佛之恩。時諸菩薩摩訶薩。聞佛作是說已。皆大歡喜。徧滿其身。益加恭敬。曲躬低頭。合掌向佛。俱發聲言。如世尊敕。當具奉行。惟願世尊。願不有慮。諸菩薩摩訶薩衆。如是三反。俱發聲言。如世尊敕。當具奉行。惟願世尊。願不有慮。爾時釋迦牟尼

佛。令十方來諸分身佛。各還本土。而作是言。諸佛各隨所安。多寶佛塔還可如故。說是語時。十方無量分身諸佛。坐寶樹下師子座上者。及多寶佛。并上行等無邊阿僧祇菩薩大衆。舍利弗等聲聞四衆。及一切世間天人阿修羅等。聞佛所說。皆大歡喜。如來於今日中夜入大涅槃不復有所說。